

小乘經單譯惣四卷

無八

分別經

未生怨經

四願經

獬狗經

分別經

西晉三藏法師竺法護譯

聞如是一時佛在舍衛國祇樹給孤獨之園

晨朝整服儼然而坐佛語阿難告諸比丘皆  
寂靜明聽今當為汝說人生受苦阿難從座  
起整衣服為佛作禮白佛言願樂欲聞佛言  
人有六惡以自侵欺何謂為六眼為色欺耳  
為聲欺鼻為香欺口為味欺身為細滑欺意  
隨邪念為邪念欺是為六欺令人墮惡道中

無有出期黠人乃諦覺是耳佛言人從三可  
得三苦何謂三可一身可殺盜姪二口可兩  
舌惡罵妄言綺語三意可貪恚癡用是三可  
故墮地獄餓鬼畜生中是為三苦唯黠者覺  
之佛言人有六恣墮十八痛何謂六恣眼恣  
入色耳恣入音鼻恣入香口恣入味身恣入

細滑意恣入邪念是為六恣亦為受亦為衰  
用是故墮十八地獄苦痛長久無有出期  
阿難白佛言人有事佛受戒能得脫是苦痛  
不佛言有人事佛受戒得福無量不可譬喻  
者有人事佛墮極罪者阿難問佛事佛受佛  
戒當得福更得深罪何以故願聞其意佛言  
有人事佛奉持經戒精進不犯得福無量不  
可譬喻也佛言有人事佛受戒不持不能精  
進禪定思惟託名事佛專行邪業貪求無厭  
不知止足姪洩色欲好喜歌舞耽于酒味以  
自放恣雖云事佛其過難量用是之故長墮  
三塗苦痛萬端難得免出

佛言事佛有三輩一輩者為魔弟子事佛二  
輩為天人事佛三輩為佛弟子事佛何謂魔  
弟子事佛佛言雖受佛戒心樂邪業卜問是  
崇解除禱祀信有家親丈人不信正真不知  
有罪惡之對假名事佛常與邪俱死有墮無  
擇地獄受苦長久久乃出為魔邦屬諛諂妖

難難可得度是曹輩人宿命餘福暫得一時見於正道心意曹曹難宿已當復更入邪見無窮已也是為魔弟子事佛何謂天人事佛受持五戒行於十善至死不犯信有罪福作是得是壽終之後即生天上是為天人事佛何謂佛弟子事佛奉持五戒廣學經戒修治

無六

二

行

上慧知三界苦心不樂著欲得解脫行於四等六度愍傷衆生欲安濟之不貪身命知死有生求長益福不為邪業是為佛弟子事佛佛言吾般泥洹後千歲魔道當興時世大惡國無常主民無常居遠方之人當入中國掠殺殘暴無有法則於斯之際像法當興盛阿

難問佛何謂像法佛言當來比丘不持正法挾妻養子無有慚愧心耕田種植以為常業無復學問坐禪行者好樂俗裳以為綺雅伴伴相看上下雷同發不相教度世之基迷色欲不畏于罪時有知法者為說真言教示正法便懷憎嫉欲毀壞之為立言議抄持長

短誹謗驅感其使無慘用是之故大法轉滅阿難問佛於是之時頗有奉法者不佛言多有事佛亦出家者耳但不持戒共相嫉妬識義者少多不曉解阿難言當爾之時何國最惡不信行者佛言真丹之士當有千比丘共在大國墮魔邦界其中黠者若一若兩為佛

弟子耳生六天上者亦復少少在魔邦者甚多甚多佛言吾般泥洹後亦多有外學來求吾道度者當隱括審悉三月知其志能習清淨行虛寂少欲不為汙行便可受之先授十善滿三年已服習道意事示犯乃為更受二百四十戒其為威儀之事精進守行皆向解

無八

三

行

脫是彌勒所當建也當從得度以為應道阿難問佛如佛所說我皆頂受宣語後人令佛之弘法不為斷絕佛言阿難汝前後所受皆以貫心我亦知汝有信護於佛法也阿難問佛後若有人信樂應法至心欲求斷世違俗以從正道若時無明師傅教戒者若有一人

書寫戒律授與之便可得度爲道者不佛言阿難皆當得知禁法者爾乃可授戒耳不可以文字受便爲應法何以故佛爲天上天下之大智天上天下之大度天上天下之大明不可妄傳失旨皆當明於戒法禁律事事委練乃爲相授耳不明法戒禁要之事而妄授人戒法違佛誠信反用爲是大罪不小也宜以審諦阿難白佛言後末之世若有人至心至意厭於苦痛欲求度脫世無有佛當以何濟其來意佛言阿難當將詣彼明戒法者曉習威儀禁要之事如是應度度亦得度自不明曉而復授彼兩迷失道渾沌無窮竟已何從得度脫耶佛言當來有比丘不能自淨畜妻養子身行汙濁貪求供養不信罪福而望安樂難得免脫甚亦可傷阿難白佛言如是後世其有從道被脫皆是佛威神其人以得像於正真因緣當從得脫何緣中復不信違佛明教當復更若干無數劫受苦痛耶佛言

阿難是皆前世無數劫墮久苦之中其人於苦痛之地自悔責願得爲善當從得脫緣一時自悔之福輒得福隨來生末世爲人暫覩佛經又能除剔頭髮以爲比丘本識未滅心意猶豫瞢瞢不了故有汙濁多不能離俗不遇明慧如是當後更墮極苦之中受無數劫罪佛言諸比丘汝以出家捨妻子棄世行作沙門當修戒行如羅漢法寧以洋銅灌口中下過焦爛腹腸終不無德受人信施寧以利刀截手肢解身體不以無德受人信施人無德力受人信施當累劫墮於罪苦久久得出用餘糶<sup>無</sup>抹之福得爲人身當復更還一一償<sup>四</sup>之有作奴婢償者有作兒子償者有作父母償者阿難問佛何謂償債佛言有作奴婢大家搗打不以道理奴婢受之無有怨心勤力作務不憚勞疲愛惜大家之物不敢放散是爲現世償債奴婢也宿命先世受人信施不行功德罪畢來償猶有本識故無慙恚甘受

而已何謂償債兒子致財父母散用無有限度兒子心亦無惜意是為償債兒子何謂償債父母父母致財兒主散用父母不為愛惜恣所當得皆是宿識因緣相償故無惜心諸此償債因緣合會對訖更散亦無常住明者覺之故不為也唯有道德可以久保吾

前世時亦更為人償債奴婢兒子父母不可稱數皆有一時之緣難可免脫至今得道現我父母皆先世道德之緣不由償債父母出世放捨使我學道累功精進今成得佛皆是父母之恩人欲學道不可不精進孝順一墮失人種累劫不復五末之世特宜順行遭值

經道不可不勤遭值佛世不可不諦受者心遭值明人不可不勤問奉受何以故人身難有六情難具才聰難得佛難得見經難得聞故宜勤之佛言吾般泥洹後當有五逆惡世當斯之時真丹土域魔事當盛閉塞正道雖有經法少有學者設有學者少有行者世有

無八

五

比丘少能自守清淨多有汙濁習俗之行高望遊步世人無異求好衣服學世辯辭追世禮費群黨相隨以快心意求世名譽教人入法度為弟子不教護魔不依正道度世之業亦不學問追求明智自謂德大不守根門雖得為人假時而已自謂長久不知大對當後

受苦無窮竟已顛倒翻覆在魔部眾一何痛哉諸比丘以得人身六情完具觀佛經戒勤行當行誦之一失人本難有復時佛世難值經法難聞宜各思惟佛說經竟諸比丘皆儼然坐自思惟即得羅漢  
分別經一卷

未生怨經

吳月支國優婆塞支謙譯

聞如是一時佛在王舍國雞山中諸天龍鬼神帝王臣民皆詣佛所稽首承風供養之儀靡不盡禮調達觀之其嫉無量還告太子未生怨曰汝父鞏國眾寶以貢佛諸沙門國藏